

Kinguaassiutitigut atornerluisimasut pineqaatissinneqarnerannut atatillugu, kinguaassiutitigut atornerlueqqinnissaq pinngitsoorniarlugu katsorsarneqartalernissaat siunertaralugu nunatsinni pinerluttulerinermut inatsisip allannguutissaanik saqqummiussisoqarsinnaaqqullugu Naalagaaffeqatigiinnermi oqartussaasut saaffigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Stine Egede, Inuit Ataqtigiit)

Akissuteqaat

(Isumaginninnermut, Ilaqutariinnut Inatsisinillu Atuutsitsinermut Naalakkersuisoq)

Aappassaanerreqarnera

Naalakkersuisut Inatsisartut aalajangiiffigisassaattut siunnersuummik matuminnga Stine Egedemit, Inuit Ataqtigiit, saqqummiunneqartumik, Inatsisinut Ataatsimiititaliap peqqissaarullugu suliaqarsimaneranut qujaniarput.

Naalakkersuisut pineqaatissinneqarsimasunut inissiisarfinni akuleruteqqissinnaanermik ukkataqarnissaq pineqaatissinneqarsimasunullu inissiisarfiit eqqartuussanik toqqorsiviinnaanginnerat pillugit ataatsimiititaliaq Naalakkersuisullu assigiimmik isumaqarmata nuannaarutigaa.

Siunnersuuteqartoq sammisamut pingaarutilimmut ukkataqalersitsimmat nuannaarutissaavoq.

Naalakkersuisut tamanna tunuliaqutaralugu allannguutissatut siunnersuut saqqummiunneqartoq ataatsimiititaliamit isumaqatigiittumit akuerineqarmat nuannaarutigaa, Naalakkersuisunimmi kissaatigineqarpoq pinerluttulerinermi inatsimmi kinguaassiutitigut pinerliinermik aalajangersakkanik unioqqutitsisimasut pineqaatissinneqarsimasunut inissiisarfimmiinnissamik eqqartuunneqarsimasut tamarmik katsorsarneqarnissamut peqataanissamut kajumissaarniarneqassasut. Taamaaliornikkut kinguaassiutitigut pinerlussimasut katsorsarneqarnissamut naleqquttutut eqqartuussisumit nalilerneqarsimasut kisiisa pinnagit katsorsaanermut peqataasoqarsinnaanera qulakkeerneqassammat.

Naalakkersuisut taamatut oqaaseqarlutik siunnersuutip aappassaanerneqarnissaanut oqaluuserisassanngortitsipput.